

Regional News Unit AIR Aizawl
Friday, August 28, 2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Ni 2 awh Mizoram Legislative fur thutkhawm chu nizan khan Speaker Pu Lalbiakzama'n tiam chin awm lovin a ti tawp.
- Ramchhunga infiammi ten tunlai mila hma an sawn theihna tura infuih tharna Khelo India Dialogue pualin Mizoram hmun hrang hrangah infiammi leh zirlaite tan infuih tharna hun hman a ni.
- FIH Hockey World Cup Belgium leh Netherlands a khelh zawh takah Lalremsiami telna India team chu 5-na an ni.
- Nepal tuilian avanga thi zat chu 359 an tling tawh.

<><><>

ASSEMBLY ADJOURNED SINE DIE

Ni 2 awh Mizoram Legislative fur thutkhawm chu nizan khan Speaker Pu Lalbiakzama'n tiam chin awm lovin a ti tawp.

Mizoram Legislative Assembly pakua-na thutkhawm vawi 7-na tawpna nimina neihah zawhna pahnih chhan hman niin Sawrkar bill leh paper bakah report hrang hrang pharh a ni.

Speaker Pu Lalbiakzama sawi danin tun session chhungah hian chhan nghal chi zawhna (starred question) lut 300 atangin 295 pawm a nih thu leh ziaka chhan chi (unstarred question) lut 73 zinga 72 chu pawm a ni a, Report tur pawimawh 9 house dawhkanah pharh a ni a, sorkar lehkhaw pawimawh House dawhkana pharh 15 a awm a, official reslution pakhat pawm a ni a. Sorkar bill 6 te sawiho a nih hnua pawm vek an ni bawk.

Tuntum thutkhawm atana zawhna lut zingah Starred leh Unstarred Question zawhna chhan loh 22 a awm a, Member te hriattur tul te a sawi zawh hnu ah Speaker Pu Lalbiakzama chuan Mizoram State Legislative Assembly 9-na thutkhawm vawi 7-na chu tiamchin awm lovin a titawp ta a ni.

<><><>

STATE SONG-OFFICIAL RESOLUTION

Mizoram Assembly chuan 'Ro Min Relsak Ang Che' tih hla Rokunga phuah chu Mizoram State Song ni turin a pawm.

Chief Minister Pu Lalduhoman nimin khan house ah Official Resolution pu lutin India Danpuiin state song neih a khap lem loh avangin kumin August ni 10-a Cabinet meeting chuan state song neih ve ngei tula an hriat angin Rokunga phuah 'Ro Min Relsak Ang Che' tih hla chu state song atan hman ni se a ti a. He hla hian Pathian chu hnamtin chung a roreltu leh kulhpui nghet leh Lalber te Lalber a nih zia a puang chhuak a, he hla hi ram rorelnaa Pathian ram tundin a nih zel theihna tura fuihtu leh hun khirh leh harsa paltlang thei tura rinna leh chakna petu ni tura a duh thu a sawi a. He hla hi official-a sak a nih apiangin ding chungin kutphah ding lam lung zawna dahin, rilru tawngtaina nena sa turin an inngen nghal bawk a ti.

He resolution hi member hrang hrangin an sawiho hnuah House chuan lungtual takin a pawm a ni.

<><><>

PEACE ACCORD –CALLING ATTENTION MOTION

Chief Minister Pu Lalduhoma'n Mizo Peace Accord chungchangah MNF chu debate puiah a sawm.

Nimina Assembly Session-a MNF MLA Dr. R. Lalthangliana'n calling attention motion a putluhah, tunhnaia Law Minister ni bawk, Chief Minister Pu Lalduhoma'n Govt. Mizoram Law College-a thu a sawinaah kum 1986-a Memorandum of Settlement sign chu Mizoram leh India inremna ni lovin Mizorama party pakhat leh Home Ministry inremna a ni a, a ropui tehchiam lo tia a sawi chuan Mizote inkarah inhnialna a siam a, hei hi reh tawh se a tih thu a sawi a, hei bakah hian ILP leh Article 371G hnuaia Mizoram special provision te chu central sorkarin duh hun hunah a lak bo theih thu leh inhumhimna atana rintlak loh anga a sawi chuan Mizorama political party hrang hrangte, mithiamte leh mipui nawlpui a thawng hle tih a sawi bawk a ni.

House Leader, Chief Minister Pu Lalduhoma chuan chhangin, hemi chungchang hi an sawi fo dawn a nih chuan Mizoram mipuite chuan thudik an hriat theih nan MNF chu an party atangin an duh ber thlang chhuak se, amah nena debate neihpui turin rawtna a siam tih a sawi a, MNF President Pu Zoramthanga leh Pu Laldenga fanu Dr Rinzuali te pawhin MNF leh India inremna tia an sawi an huat loh laia ama sawi an haw ta bik chu a hriatthiam loh thu a sawi bawk a ni.

<><><>

NATIONAL SPORTS DAY/KHELO INDIA DIALOGUE

Ramchhunga infiammi ten tunlai mila hma an sawn theihna tura infuih tharna Khelo India Dialogue pualin Mizoram hmun hrang hrangah infiammi leh zirlaite tan infuih tharna hun hman a ni.

Khelo India Dialogue pual hian Prime Minister Narendra Modi a’n nimin khan Khelo India Dialogue ah Video Conference kaltlanga thusawiin infiamna kawnga ramn hma a sawn theihna tur kawng hrang hrang a sawi a, infiamna ah medal ringawt ni lovin ram hmasawn zawka India siam tur leh inpumkhat zawk annih theih nana tan la theuh turin a chah a, taksa insawizawi pawimawhna sawiin rilru hrisel nei tur leh mahni inthunun tlat zel turin kalkhawmte a chah a ni.

Khelo India Dialogue pual hian Mizorama zirna in hrang hrangah hun buatsaih a ni a, Aizawl ah chuan Govt. Aizawl North College-a NSS Unit buatsaihin hun hman a ni a, Resource Person Dr. T. Lalremruata chuan infiamna ah thawhhona tha bakah inpumkhatna leh mahni inthununna a pawimawh thu a sawi a ni.

Champhai ah chuan Govt. Champhai College ah hman hman niin NSS PO Lalventluanga'n infiammi te leh zirlaite hmasawnna tur hrang hrang a tarlang a, zirlaite nen inkawmho a ni bawk.

Hnahthial ah chuan Gov't Higher Secondary School ah hman niin Khelo India Judo instructor Zomuansanga'n a hman pui a, Zirlai Mipa 67 leh Hmeichhia 60 ten he hun hi an chhim a ni.

Saitual ah chuan Govt Saitual College ah hman niin Khelo India Saitual District Representative Laltleipuia chuan Khelo India in naupangte hmakhaw ngaia infiamna kawngah theihtawpa chher mek an nih thu sawiin Saitual district ah chuan Khelo India hnuaiah Football leh Wrestling naupangte zirtirin ngawrh taka kalpui mek a nih thu a sawi bawk.

<><><>

HEALTH MINISTER

Health Minister Pi Lalrinpuii'n MUHCS 2.0 ah kumin August thla thlenga sawrkar hnathawk nghet hlawk cut sak zat chu cheng nuai 541 a ni a ti.

Assembly thutkhawma ziaka zawhna a chhanna ah he thu hi sawiin Pi Lalrinpuii chuan Provisional Employee te hlawh pawh cut tel sak anni a ti a, August thla thleng cheng nuai 29.3 (Cheng nuai sawmhnih pakua leh singthum) a ni a ti bawk.

Health Minister chuan CSS hnuaia thawkte erawh MUHCS 2.0 ah Cut anni ve lo a ti a, MUHCS 2.0 hnuaia registration tih theihnaah ah Semi Cabin thlan theih tur awm mahse MUHCS zawmtu Sorkar Hospital leh Private Hospital zawng zawngah Semi Cabin a awm vek kherlo a ti bawk.

<><><>

TOURISM MINISTER

Tourism Minister Pu Lalngthinglova Hmar chuan Sairang thlenga rel a luh hnuah Mizorama khualzin chu nikum september thla atanga kumin June thla inkarah mi nuai 9,30,930 chhinchhiah anni a ti a, a punna chu za zela 84.41% a ni.

Pu Lalngthinglova Hmar chuan khualzin tam zawk leh Mizoram-a an awm rei zawk theih nan riahna, ei leh in, leh khual dawnawm dan mumal zawka tihchangtlun a, Mizoram a thilpek theih te hmasawnna ruhrel tihchak bakah hmunhma tlawh tur a pun theih nan project siam thin a ni tiin tourism atangin sum a luh tam zawk beisei a ni a ti bawk.

Tourism Minister chuan Khualzin an pun hnuah Aizawl leh a chhehvelah hotel leh homestay a pun phah a ti a, Hotel leh homestay-te fai leh taka a awm theih nan Tourism Department-in endikna a kalpui thin a ti bawk.

<><><>

KYTA

‘Know Your Territorial Army’ (KYTA) Seminar leh TA 2.0 Symposium chu nimin khan Kolkata-a Dhono Dhanyo Auditorium ah neih tan a ni a. Ramchhung hmun hrang hranga sipai leh NCC Cadet te an tel a ni.

Symposium hi Chief of Staff, Eastern Command Lt Gen Gambhir Singh chuan a hawng a, he hunah hian tunlai thiamna hmanga hmasawn dan tur hrang hrang zirho a ni bawk.

Programme ah hian Mizoram hnam leh nunphung ropui tak entirna a ni a, Mizoram sawrkara Art and Culture hnuai artiste mi 20 te chuan Mizo hnam lam leh nunphung, thil tih dan leh Mizo nunphung mawi tak an entir a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HOCKEY TEAM INDIA

FIH Hockey World Cup Belgium leh Netherlands a khelh zawh takah Lalremsiami telna India team chu 5-na an ni.

Lalremsiami telna India team hian nimin khan Germany chu 3-1 in an hneh a, Hockey World Cup ah hian a pumpuiah 5-na niin kum 1974-a India hmeichhe hockey team in 4-na an nih hnuah an tih that ber tum a ni.

India hmeichhe hockey team hian tournament ah huan wawi 1 chiah hnehloh tawngin 5-na inchuh turin an tel pha a, Germani nen intumin 3-1 in hnehna an chang a ni.

<><><>

NEPAL UPDATE

Nepal tuilian avanga thi zat chu 359 an tling tawh. Tun dinhmunah chin hriatloha bo mi sang chuang awmin chhanchhuah hna ngawrh taka thawh mek a ni a. Nepal Police te chuan nimin khan ruang 93 an hmuh belh tih an sawi a.

Heti hian Chitwan ah mi 108, Nawalparasi East ah 62, Dhading ah 27, Gorkha ah 20, Rasuwa ah 17, Nawalparasi West ah 15, Nuwakat ah 12 leh Tanahun ah ruang 9 hmuh tawh anih thu Nepal Police te chuan an sawi.

Hetihlai hian Union Ministry of External Affairs chuan he tuilian tuar India mi 84 chhanchhuah an nih tawh thu an puang a. Mi 280 vel chin hriatlohin an la awm bawk a ni.

India chuan chhawmdawlina bungraw hrang hrang tonne 47 chuang Nepal ah a thawnlut tawh bawk a ni.

<><><>